

23/6/2018

SIARAN MEDIA:

Acara sambutan Hari Air Sedunia Negeri Pulau Pinang 2018, dirasmikan oleh Ketua Menteri Pulau Pinang YAB Tuan Chow Kon Yeow.

PEMBALAKAN DI ULU MUDA BUKAN ISU PERHUTANAN, IA MENGANCAM SOSIO EKONOMI

PULAU PINANG, SABTU, 23/6/2018: Pembalakan di Ulu Muda mesti dianggap sebagai ancaman kepada sosio ekonomi di negeri-negeri utara Perlis, Kedah dan Pulau Pinang dan bukannya isu perhutanan.

Ketua Menteri Pulau Pinang YAB Tuan Chow Kon Yeow berkata Ulu Muda lebih daripada sekadar hutan simpan. Ulu Muda merangkumi 163,103 hektar hutan hujan di Kedah yang “menadah” 96% air mentah Kedah, 70% air mentah Perlis dan lebih 80% air mentah yang diabstrak oleh Pulau Pinang dari Sungai Muda setiap hari.

“Ia adalah kawasan tadahan air yang paling penting di kawasan utara,” katanya pada majlis sambutan Hari Air Sedunia 2018 di Taman Bandaraya di sini hari ini.

Beliau berkata, ketika pembalakan menjejaskan Ulu Muda sebagai kawasan tadahan air, 3 negeri utara akan menghadapi risiko krisis air serantau.

“Sekiranya berlaku krisis air serantau, 4.09 juta orang akan mengalami kekurangan air; beribu-ribu perniagaan akan mengalami kerugian; dan sumbangan KDNK 3 negeri di Malaysia akan terjejas,” katanya.

“Oleh itu, pembalakan di Ulu Muda adalah ancaman sosio ekonomi. Ia mengancam kesejahteraan rakyat kita, perniagaan kita dan ekonomi serantau.”

Beliau berkata Pulau Pinang dan Perbadanan Bekalan Air Pulau Pinang Sdn Bhd (PBAPP) komited terhadap kempen untuk “Selamatkan Ulu Muda” untuk faedah Perlis, Kedah dan Pulau Pinang.

Beliau menambah Pulau Pinang bersedia untuk bekerjasama dengan Kedah untuk memohon pampasan Persekutuan sebagai ganti “premium

hutan” untuk pembalakan; serta mendapatkan bantuan Persekutuan untuk mewarta, mengurus dan melindungi Ulu Muda sebagai kawasan tadahan air serantau.

“Kini Kerajaan Negeri Pakatan Harapan di Kedah dan Kerajaan Persekutuan Pakatan Harapan di Putrajaya. Ia adalah masa yang baik untuk melihat semula pembalakan di Ulu Muda sebagai satu isu yang menjejaskan Perlis, Kedah dan Pulau Pinang,” kata YAB Tuan Chow.

“Kerajaan Negeri Pulau Pinang akan berusaha untuk menyelesaikan isu ini di peringkat negeri ke negeri. Kami juga akan mendapatkan sokongan daripada Ahli Parlimen (MP), untuk menyelesaikan isu ini di peringkat Persekutuan.

“Saya harap semua Ahli Parlimen Pulau Pinang akan menyokong misi untuk menyelamatkan Ulu Muda. Jika kita dapat mendapat sokongan daripada Ahli Parlimen di Kedah dan Perlis, itu lebih baik,” tambah beliau.

Sementara itu, Ketua Pegawai Eksekutif PBA Holdings Bhd dan PBAPP Dato’ Ir. Jaseni Maidinsa berkata PBAPP “amat prihatin terhadap pembalakan di Ulu Muda.”

“Dalam merancang untuk mengelak krisis air, kami membantu Pulau Pinang membina rizab rawatan air sebanyak 34.8%, yang tertinggi di Malaysia. Ini bermakna bahawa kapasiti rawatan air kita adalah 34.8% melebihi permintaan air di Pulau Pinang pada tahun 2017.

“Bagaimanapun, kami tidak dapat membekalkan air terawat yang mencukupi jika kami tidak dapat mengekstrak air mentah yang mencukupi dari Sungai Muda; dan air mentah yang kita abstrak dari Sungai Muda berasal dari Ulu Muda,” katanya.

Menurut beliau, apabila hutan hujan di Ulu Muda makin terhapus oleh pembalakan, akan berlaku krisis air yang belum pernah terjadi di Perlis, Kedah dan Pulau Pinang.

“Jika kita tidak berbuat apa-apa dan membiarkan malapetaka ini berlaku, impak itu bukan sahaja meluas, ia akan menjadi jangka panjang. Krisis air yang disebabkan oleh penebangan hutan tidak dapat diselesaikan dengan mudah. Hutan hujan tidak tumbuh semalaman. Tidak ada tangki air yang cukup di Malaysia untuk membekalkan air setiap hari kepada 4.09 juta orang,” katanya.

Dato' Ir. Jaseni menggesa “rakyat Malaysia Baharu” untuk menyuarakan kepada Ahli Parlimen mereka untuk menimbulkan isu Ulu Muda di Parlimen.

“Sekiranya kita boleh menukar Kerajaan Persekutuan Malaysia pada tahun 2018, saya percaya kita boleh menghentikan pembalakan di Ulu Muda,” katanya.

Dato' Ir. Jaseni juga menggesa media massa untuk terus mengetengahkan isu ini di mata awam. “Bagi NGO (organisasi bukan kerajaan) dan rakan-rakan yang lain, sila teruskan perjuangan yang baik ini,” katanya.

“Marilah kita bersama-sama melindungi Ulu Muda. Sila ingat: kita tidak melakukan ini hanya untuk tumbuhan dan haiwan. Kita mesti menyelamatkan Ulu Muda untuk melindungi diri kita, anak-anak dan cucu kita,” tambah beliau.

Dikeluarkan : Puan Syarifah Nasywa bt Syed Feisal Barakbah
Unit Komunikasi Korporat
Tel : 04-200 6607
Email : syarifah@pba.com.my